

A group of diverse students, both male and female, are shown from the chest up, holding up their textbooks. They are smiling and looking towards the camera. The background is a soft-focus indoor setting. The overall color palette is a mix of teal, green, and blue, with a horizontal light flare across the middle.

Wahai
Anak Didikku

Bahasa Arab
Perjalanan Ilmu
& Pembentukan
Jiwa



[Experts](#)

Warkah Buat Anak Didikku Bahasa Arab: Perjalanan Ilmu dan Pembentukan Jiwa

9 February 2026

Wahai anak didikku yang dikasihi,

Di Universiti Malaysia Pahang Al-Sultan Abdullah (UMPSA) ini, kehadiran anda dalam kursus ULA1312 (Arabic A1) bukanlah satu kebetulan. Mungkin ada yang hadir kerana tuntutan kredit, untuk lulus peperiksaan atau memenuhi keperluan kursus. Namun ketahuilah, naskhah pembelajaran yang berada di tanganmu ditulis bukan sekadar untuk menambah ilmu di dada, tetapi untuk menambah ilmu dan membentuk jiwa. Ia adalah satu proses pembentukan diri secara perlahan, mendalam dan penuh makna. Dalam dunia yang penuh pancaroba ini, bahasa Arab hadir sebagai guru yang mengajar kesabaran, ketekunan dan kerendahan hati.

Mempelajari bahasa Arab sering kali dianggap sebagai cabaran besar dalam menghafal kosa kata (*mufradat*) atau memahami tatabahasa (*nahu*). Namun, wahai anak didikku, bahasa ini jauh lebih luas daripada sekadar susunan huruf. Ia adalah kunci yang membuka pintu kepada pemahaman makna yang mendalam, penerapan adab yang mulia, dan penemuan hikmah di sebalik setiap baris ilmu. Setiap perkataan yang anda sebutkan adalah jambatan yang menghubungkan logik akal dengan kehalusan budi.

Di sebalik setiap kalimah, tersimpan sejarah ilmu, adab para ulama, dan hikmah peradaban yang panjang. Ketika lidah belajar menyebut huruf-hurufnya, akal dilatih untuk berfikir secara tersusun, dan jiwa diasuh untuk memahami bahawa ilmu ini tidak akan terpisah dari nilai-nilai murni. Kesukaran menyusun ayat atau keberanian bertutur yang masih rapuh bukanlah tanda kegagalan, sebaliknya petanda bahawa proses pembelajaran sedang berlaku.

Dalam konteks pelajar universiti teknikal seperti di UMPSA, bahasa Arab mungkin kelihatan jauh daripada dunia kejuruteraan dan teknologi. Namun hakikatnya, penguasaan bahasa ini melatih kemahiran insaniah yang amat diperlukan seperti komunikasi, disiplin diri, kepekaan budaya dan keyakinan. Malah lebih daripada itu, bahasa Arab membuka ruang untuk memahami teks-teks sumber yang membentuk pemikiran Islam, seterusnya membantu pelajar membina keseimbangan antara kecemerlangan intelektual dan kekuatan rohani.

Wahai anak didikku,

Janganlah memandang kursus ULA1312 ini sebagai satu bebanan kredit. Pandanglah ia sebagai satu kurniaan untuk anda mengenali keindahan bahasa syurga. Biarlah setiap titisan dakwat dan setiap suara yang keluar daripada lisanmu menjadi saksi bahawa anda sedang mendidik jiwa untuk menjadi insan yang lebih beradab dan berhikmah.

Teruskan melangkah. Pintu kefahaman sentiasa terbuka buat mereka yang tidak berhenti mencuba.

Akhir Sekali, Wahai Anak Didikku.

Lembaran ilmu di tangan anda juga bukan sekadar untuk menambah ilmu, tetapi untuk membentuk jiwa. membuka pintu untuk memahami makna, adab dan hikmah di sebalik ilmu.

Belajarlah dengan sabar dan rendah hati, kerana bahasa ini mengajar kita bahawa ilmu yang benar akan mendekatkan akal kepada kefahaman dan jiwa kepada Tuhan.

Selamat maju jaya wahai anak didikku.

“Ilmu yang benar akan mendekatkan akal kepada kefahaman dan jiwa kepada Tuhan.”



Oleh: Rosjuliana Hidayu Rosli

E-mel: rosjuliana@umpssa.edu.my

Penulis ialah Guru Bahasa, Pusat Bahasa Moden (PBM), Universiti Malaysia Pahang Al-Sultan Abdullah (UMPSA).

Rencana ini merupakan pandangan peribadi penulis dan tidak menggambarkan pendirian rasmi Universiti Malaysia Pahang Al-Sultan Abdullah (UMPSA).

- 56 views

[View PDF](#)